

НАРОДНЫ НОВИНКЫ

р. XVII
ч. 45 – 48

28. новембра 2007
ціна 6,- Ск

КУЛЬТУРНО-СПОЛОЧЕНЬСКИЙ ТЫЖДЕННИК РУСИНІВ СР



• Сучасна Містна організація (МО) у Пряшові Русинської оброди на Словенську (РОС) 29. новембра 2007 на великій сцені Театру Александра Духновича (ТАД) реалізувала першу свою велику акцію – Дні русинських традицій, котра была програмом русинського слова, музики, співу, театралного уменя, фолклорных звиків і традицій. Говорене слово ся орьєнтовало главно на два в сучасности важны проблемы – русинське розгласове высыланя і Руськый дом у Пряшові. В програмі выступили: (зверху зліва) Старославянський хор Грекокатоліцького кафедрального храму св. Яна Хрестителя у Пряшові, артиста ТАД Іван Стрпоковский, солістка ПУНА Анна Барнова, бывший директор ТАД і главный конференсьер програму – Ярослав Сисак, артиста ТАД і знамый розгласовый Кум Дыня – Ігор Латта, быша ведуча русинського розгласового тіму Феодосія Латтова, (долів зліва) дїтська фолклорна група Сонічко зо Шаріського Ястраба, на „устній гармоніці“ заграє Дімітрій Крішко, свої віршы прочітав поет Штефан Сухий, фолклорна група Тихопоточан представила свядьбаны звикы свого села. Участникам ся привварив председа МО РОС у Пряшові Федор Віцо і вікарь про Русинів Пряшівської грекокатоліцької епархії – о. Павел Петро Галько, ЧСВВ. Фоткы: А. Зозуляк

Лекція о Русинах Словакії – в Москві

Жыют у великім місті, а главно у меґамісті, охаблять на нас свій слід. Часто за множеством тых або інших сувязей, многих діл, траить ся главне. А што є главне? Скоріше того, што є главне, є і фундаментом... За конкретныма прикладами поберуємо ся обернути к історії, она все буде богатше у своїх деталях. Якраз к такій історії ся подарило дотулити групі московских славистів і любителів славянської культури на публічній лекції історика Михайла Дронова 20. октобра 2007 року на засіданю славянського молодежного клубу при Московській бібліотеці української літератури.

Вірвавши ся од каждоденных проблемів, не понагляючи ся, в єдну похмурну суботу зышла ся достаточо велика про подобны акції компанія заінтересованых слухачів. То не чудо, бо в посліднім часі міджі узкым кругом спеціалістів росте интерес к русинській проблематіці, але іщі не є розвинутый міджі шыроков громадів. Причину того треба глядати в недостаточных інформаціях. Час од часу ся дістають до Москвы інформації за помочи розлічных і куцых істочників, чім страчають свій сістем і научну істоту.

Цілієм даной лекції, подля мене, было желаня автора перемочи тоту наверхственость, часто протиречивых міджі собов інтерпретацій історичных подій і фактів сучасной реалности. О русинськым націоналінім руху была открыта єго глибока основа, указаний фундамент, який доволёвав му утримати ся під напором многих дештруктивных внутрішніх і вонкашніх факторів. Таков опорів є традиція із народного істочника, скады черпали свої силы як національні будителі, так обычайны представителі русинського народа. Підтверджуючі повіджене, **богатым історичным матеріалом автор отворив перед слухачами сам феномен русинства, доказав єго многогранность і реалность.**

Таки акції суть ужиточны в ділі популяризації і наслідного осмысління богатой, основаной на глибокій традиції, русинської культури. Они доволяють інакше ся попозерати на історію і видіти в морю фактичных матеріалів главне, яке є основов у розвою як великого, так і малого народа і каждого чоловіка окреме.

Сергей СЛОИСТОВ, Москва

Олена Рудловчакова была ліпша, як єпископ

16. новембра 2007 року у віці **недожытых 89 років** свого жывота у Пряшові умерла Доц. ПгДр. **Олена Рудловчакова**, к. н. Одправы за помершых ся одбыли в Домі смутку в Пряшові 21. новембра 2007 року о 13. годині, похована была в Празі на Олшаньскім цінтерію.

Кінцём 90-ых років 20. стороча ем безвыслідно зганяв книжку Івана Дулішковіча „Историческое черты Угро-Русских“ в трёх томах, котра вышла в Ужгороді в роках 1874 – 1877. В тім часі у єзуїтів у Кошіцях діяв єзуїта о. Ян Бабяк (теперішній пряшівський грекокатоліцький єпископ). Каждый день одправляв у єзуїтській каплиці про римокатоликів римокатолицьку омшу. На єго омшу ходила і єдна наша знама. Нагодов барз добрі выходила з єзуїтом Бабяком, а то аж так, же ся всягды хвалила, же як іде ку Бабякови на святе причащаня, фурт ей дасть тоту найвекшу гостію. Раз бісідовала, же Бабяк ся хвалив, же в єзуїтській бібліотеці Центра Выход-Запад в Кошіцях мають ай цінну споминану книжку Дулішковіча. Такой ем заанґажовав свою маму Гізелу, жебы через тоту Бабякову облюбену вірнічку про ня книжку Дулішковіча од Бабяка пожычила, жебы ем собі міг з нёй зробити фотокопію. Тота вірнічка пішла за ним і попросила го книжку пожычити. О. Ян Бабяк був зачудованый і опросив ся ей: „А нашто вам буде? Книжка є писана азбуков.“

Вірнічка му повіла правду: „**Книжку хочу пожычити не про себе, але про василіана о. Йосафата Тімковіча, бо з нёй собі хоче зробити фотокопію і гварить, же нигде книжку не може роздобыти і же знає о екзистенції лем єдного фалатка книжки в Римі в Італії, а теперь о другім у єзуїті в Кошіцях.**“

О. Ян Бабяк ей одповів: „Кідь хоче Тімковіч фотокопію з книжки, та ный собі іде до Рима і зробить фотокопію, я му не пожычу.“

Час утікав. Од року 2000 ем зачав діяти у Пряшівскім василіаньскім монастирю. Пані Олена Рудловчакова ходила сістематічно в неділю і на свята на Божы Службы до пряшівського монастиря. Так ем ей спознав. Пару раз ем ей навщівив ай дома. Говорили сьме о історичных темах. Пані Рудловчакова была експертка на історію Підкарпатської Руси 19. стороча і на тему русинського народного будителя о. Александра Духновича...

Пришла бісїда і на історіка 19. ст. – І. Дулішковіча і єго дорожочіну історічну книжку. Ту пані Рудловчакова говорить:

„Я єго історію мам і вам пожычу, лем мені мусите приобіцати, же книжку мені честно вернете. Бо знаєте, як ся говорить міджі науковцями – же украсти книжку не гріх – і усміхла ся так, як лем она знала.“

О. Ян Бабяк книжку не пожычив, а доцентка Олена Рудловчакова вдячно пожычила.

Доцентка Рудловчакова нам од того часу



• Знама научна працовнічка, котра принесла много цінного главно у выскумі творчости русинського будителя Александра Духновича – Олена Рудловчакова із Пряшова, котра одышла до вічности 16. новембра 2007.

пожычила немало історичных книг, котры ся не дадут в обычайных бібліотеках роздобыти. Мала, наприклад, і цензуровану історічну книжку од мадярьского грекокатоліцького єпископа Імре Тімка: „Keleti keresztényseg, Keleti egyházak“ (Budapest 1971), де єпископ І. Тімко доказує, же ціле Угорське кралёвство од 10. ст. аж до 13. ст. было візантського обряду, а латинський там був заведений насилно аж пізніше. Кідь книжка в

Мадярьску в р. 1971 вышла, римокатолицький нунцій дав єпископови І. Тімкови на выбір: або одовздав вшыткы книжки на ліквідацію, або го Ватикан збавить єпископства. Єпископ Тімко одовздав книжки на спаління, але пару книжок стигнув послати за границі. Так днесь тоту єго книжку мож найти, наприклад, в Народній бібліотеці в Парижі і в приватній бібліотеці пані Олены Рудловчаковой у Пряшові.

Доцентка Олена Рудловчакова все охотно бісідовала на історічны темы. Очі ей тогды лем так світили. Як ем мав якийсь проблем порозуміти якийсь історічны інтригы 19. ст., стаціло зайти ку пані Рудловчаковій, а она мі то точно высвітлила. Знав ем, же говорить правду, а же од нёй ся дознам веце як з будьякой енциклопедії.

Як ся дочула, же єзуїта-єпископ Ян Бабяк і римокатолици мене пронаслідують зато, же ем написав і выдав 1000-сторічкову історічну книжку „Vladimirus de juxta Hornad: Dejiny gréckokatolíkov Podkarpatska (9. – 18. storočie)“ (Košice 2004), зачудовала ся і повіла:

„То саме ся діяло і з І. Дулішковічом в 19. ст., кідь выдав „Исторические черты Угро-Русских“. Лем-лем же ся з того Дулішковіч дістав без позбавління зо священства... Сеґін Дулішковіч... мав великы проблемы.“

Интересно, же в 19. ст. римокатолици пронаслідовали Дулішковіча за єго історію, а в 21. ст. ся хвалять (теперішній єпископ Бабяк), же ей мають у своїй бібліотеці. Пані Рудловчакова ся чудовала, же римокатолици на зачатку 21. ст. ся справують ку грекокатоліцькым історікам єднако, як ай в 19. сторочу. Історія є досправды учительков мудрости.

Раз ем з пані Рудловчаковов бісідовав і о Народных новинках, котрых шефредактором є пан Александер Зозуляк. Думає ем, же як пересвідчена Русинка української орьєнтації буде на новинкы, на їх русинську „говірку“ і Зозуляка надавати. Быв ем зачудованый, же то так не было. Повіла мі, же Саша Зозуляк ей Народны новинкы посылать, же она їх сістематічно чітать і же Саша робить добру інтелектуалну роботу. Говорила, же Сашу познать одмаленька, а є то шыковный хлопец. Як говорила, было чути в ей голосі любов до вшыткого нашого – русинського.

О. Йосафат В. ТИМКОВИЧ, ЧСВВ, Пряшів

РУСАЛКА

КВАРТАЛНИК ПРО РУСІНСЬКІ ДІТИ І МОЛОДЕЖ

4/2007

Навертаня ку властному коріню – через ікону

(Молода студентка абсолювала курс писаня ікон)

Зачаток нового школьського рока приніс на телевізну образку і зачаток нової, уж третей серії „Супер Стар“, котру з великов ефоріов слідує скоро ціле Словенско без огляду на вікову категорію. Самособов, прим у слідованости веде молода генерація, ровесници „суперстарістів“. Много крику, радости, але і слыз, ефорії і



• Штудентка 1. класы Педагогічної і соціалной академії у Пряшові – Патріція ШЕБЕСТОВА з Попраду, яка ся зачала занямати писаньм ікон.

напята, вшыткы заінтересованы суть „happy і super“. І така є сучасна молодеж... Повна ребелії, неспокою, готова зробити вшытко, або скоро вшытко, жебы досягнути свій ціль. Є то добрі і в порядку, бо молодеж все была така, лем нам, што сьме дакус постаріли, ся часом видить, же сьме были замолода інакшы. Дакотры были, дакотры нїт, так як і днес... І днес ся міджі молодыма найдуть і такы, што глядають штось інакше, мають в собі покору, глядають не славу, богатство, але скоріше спокій, гармонію тіла і души, намісто глучных дискотек находять успокоїня в природі, в церкві або і в монастирях, цалком ізолваны од „вонкашнєго неспокою“.

До такой сорты молодежи патріції і штудентка першой класы Педагогічної і соціалной академії у Пряшові – Патріція ШЕБЕСТОВА. Молода талантована штудентка на себе упозорнила при нашій презентації штудія русиньского языка і культури, кідь ся як єдина з класы зачала о тот язык і культуру Русинів інтересовати, докінця ся приголосила і на предмет русиньскый язык і культура, котрый сьме дали до понуку выберовых предметів на споминаній академії.

Патріція жыє зо своєв родинов в Пораді і як каждая „справна“ русиньска родина є уж пословенчена, то значить, же дома ся комунікує по словеньскы. Єдиным ідентіфікачым знаком, котрый Патріцію привів к тому, же ей предкове были русиньского роду, ся стало православне віровызнаня, на основі котрого молоде дівча відкрило русиньске коріня своєї родины. Патріція ся докінця недавно дала похрестити і перешла на православну віру. До православной церкви ходить і у Пряшові, де од того школьського року штудує на педагогічній академії. Тихе, скромне дівча, котрому не заваджать, же до православного храму жены входять з покрытов головов, покорно закрьє красне чорне волося хустков, і так входить до храму Божого.

Патріція іщі не знать цалком точно, што хоче в жывоті досягнути, чім ся хоче стати, но знать єдно, же хоче робити того, што ей інтересує, хоче наповно выужити свій талант, бо збачіла, же кідь чоловіка робота бавить і приносить му успокоїня, він є щастливый. Молоду штудентку найвеце заінтересовало малєваня. В право-

славній церкві збачіла прекрасны ікони, котры суть характерістичны про візантійску церкву і зачала ся інтересовати іконописецтвом. Перед двома роками через літні вакації ся ей докінця подарило дістати ся до женьского монастиря недалеко грецького міста Сідеро Касто, де ся монашкы учать писати ікони. Патріція мала тогды 13 років, а ікони можуть писати лем дівчата од 17 років, но незвычайный талант доволив представеным монастиря зробити выняток. (Мімоходом, в тім часі перебував у мужкім монастирю і молодой вытварник з Пряшова, основатель постмодерного іконоклазму Ігор Пешта, о котрім сьме писали в апрілевім числі Народных новинок з 2006 року).

Так молоде дівча зачало входити до таів писаня православной ікони в грецькім Монастирю св. Кіріа і Юліты. На тихім, спокійнім місті, заперта од рушного і неспокійного світа зачала помалы пробовати на самый перед росвічовати руку писаньм чар, потім наслідовали орнаменты... Наперед терпеливы монашкы учіли вести руку по папірю – з основныма фарбами, нескорше з одтінями каждой з фарб. Дале наслідовало малєваня твари ікони. Класічны ікони, як нас поучіла молода малярка, ся пишуть на дереві, а то з фарбами, котры мають в собі примішаны жовток з яйця. В монастирю але дістали предлогу ікони на полотні, і так зачали поступно малєвати таким способом, як ся то учіли, наперед на папірю, то значить од чар, орнаментів, а посліднєв фазов была тварь ікони, котра ся малєвала на самый конец і поступно вытінєвала. Наконць ся полотно наліпило на дерево і залаковало.

Самособов, писаню ікони передовала духовна приправа. Як повіла Патріція, ікона бы ся мала писати з молитов, зато іх монашкы і духовно вели, намагали ся сконцентровати іх



• Ікона Пресвята Богородиця з Ісусом, яку написала талантована штудентка Патріція ШЕБЕСТОВА.

думкы за помочи молитвы, спокою, покори... Лем так може быти ікона доканалов і передати нелем естетичне, але і духовне посолство.

Молода штудентка побыла в монастирю цілый місяць, заперта, одрізана од світа і в покорній молитві писала „свою ікону“, котров хотіла передати світу посолство ласкы, змирливости, злагоды, надії... Як сама повіла, были то ей найкрасшы вакації, на котрых сі нелем добрі оддыхла, але ей і духовно збогатили, помогли ей зорьентовати ся в жывотных годнотах і пріорітах. Єдно з пріоріт ся про ню стало і гляданя властной ідентіты, народной приналежности і інтерес о історію властного народа.

Кветослава КОПОРОВА, фоткы авторкы.



• На бісіді з писателями, лауреатами Премії Александра Духновича за русиньску літературу – Марієв Мальцовсков (в сердині) і Штефаном Сухым было весело. Діти комуніковали спонтанно по русиньскы, было видно, же пані учителька Каміла ГУДАКОВА (зліва) іх на бісіду добрі приправила. Найвеце вопросів давали дівчата своему краянови Штефанови Сухому, котрый знову несподівав своїма найновшыма стишками • Данку КОЧАНОВУ і Катку СУРОВУ інтересовало, ці діти писателькы Марії Мальцовской читають ей книжки і як іх оцінюють, але і то, ці роспещене дівчата з приповідкы Материна правда є скучночне, або выросло лем у фантазії авторкы. Фоткы: К. Копорова

Рок і поп не є „гатланина“ ани „борц“ (Ку 2. річнику конкурзу авторьской русиньской популярной музыки, котрый ся одбыв 16. новембра 2007 у Свіднику.)

Неперек тому, же єм особно не був участником фестивалу русиньских „роковых“ (або поповых?) капел у Свіднику, стачіло мі послухати высыланя русиньского розгласу, і так єм сі міг вытворити образ фунгуючого ділетанства і незнаня елементарных принципів проблематики, котрій був фестиваль присвяченый. Мав то быти фестиваль роковых (ці поповых?) капел. Ани єдна з тых, котры передавав русиньскый розглас, не была роковов капелов. Заінтересовав ня лем Осиф КЕСЕЛІЦЯ своїм музичным „експеріментом“, котрый балансує міджі етно і пробов о нову алтернатіву. Акцент ся ту клав на тексты співанок і цалком добре аранжованя (но о выконі то уж повісти не можу). Другы одвысланы річі были „самограйковы“ отравы, напахнуты „шелшов“ славных естрадных капел з України в сімдесятих роках, но телеґонічно перемішаны із псевдо-техном і под. О текстах радшей помовчу.

Кідьже єм роковый музикант (думам, же Янко Ка-

линяк о тім знать), зістав єм немило несподіваний уж одвысланыма інформаціями о фестивалі і, не дайбоже, жебы того, што розглас пустив до етеру, было то найліпше з фестивалу, бо тогды ся треба над ним важно задумати. Притомность Івана Чіжмаря в пороті про рокову і попову музику мі припоминало часы ряджіня Міністерства культуры СР МУДр. Іваном Гудецом. Пан Чіжмарь нелем же року ани попу не розумить, але і єго коментарь односно фестивалу був „много слов о нічим“. Пан Чіжмарь, тримте ся свого „копыта“! Сьте добрый фолклоріста, так не берьте „трубачови трубу а попови кадило“! „Явор, явор, явореве листя...“ не є одказ, ани основа року (ці попу), але бесхыбный фолклор.

Тримам пальці фестивалу „року“ (або і попу) в будучім році в надії, же ся рушить з місця за путєв ку якості, а не наопак.

Др. Михал БИЦКО, Пед., теоретік уменя і музоедуколог

Першы мініфотболовый турнай молодых Русинів...

... був у Мукачеві 27. октобра 2007 року, де ся зышли штирі школярьскы мініфотболовы колективы, з чого два были заграничны. Русиньску оброду, а тым ай Словакію, репрезентовали молоды фотбалісты фотболового клубу „Карпатія“ Пряшів. Привів іх до Мукачева тренер Федор Віцо і ведучій колективу Петро Крайняк, мол. Далшым із заграничных мужств была компанія учеників Гімназії Петра Кузмяка в Руськім Керестурі із сербской Войводины. Но а два колективы были домашній провенієнції.

Першы річник мініфотболового турнаю русиньских школьских колективів ся міг зачати. Грало ся на застрешенім гріщу военьских мукачевских касарень, а атмосфера была наісто же боєва не лем зато, же ся грало на касарнєвім пляцу. Каждый з гравців ся чув як репрезентант своєї країны, бо був то, предці, турнай міджінародный. Но не хыбовав ту ани дух приятельства ці русиньской взаємности.

Мають своє выхове значіня подобны акції, што собі наісто усвідомили ай главны організаторы: Валерій Падяк і Миколай Бобинець. За три дні ся старали о колективы молодых фотбалістів і їх досрелый супровод, абы были добрі выпсаты і обознамлены з туристичныма лакомностями міста Мукачева, но ай Ужгорода. Організаторы плануєть зорганізувати ай другый річник міджінародного мініфотболового турнаю русиньских школьских колективів. Думають так, же турнай зроблять масовішым што до множества участників, де бы привітали і колективы з Мадярьска, Польщі, а в будучности ай споза моря.

Суть в сучасности тенденції міджі русиньскими языкознателями вытворити про ужывателів нашого языка єден сполочный тіп – койне...

Што тым хочеме коло фотбалу доказати? Же ту ся не потвердила потреба такого неприродного вытвору, бо молоды шпортовці ся файно дорозуміли ай порозуміли, хоть говорили маленько розлічныма языками.

Дарьмо, шпорт має міць і велику зьєднующу силу, а турнай молодых русиньских ногейбалістів то зьясь, уж по кількій раз, доказав. Не выдумали то панове Падяк і Бобинець плано, дай їм Бог здравя за одслужену роботу, а од нас мімо подякованя приймийте, панове братове, пожеланя много охоты до работы з русиньсков молодежи на полі шпорту і культури.

Турнаєвы выслідкы стріч „Карпаті“ Пряшів: „Карпатія“ Пряшів – „Руснак“ Руськый Керестур 0:1 (0:1), „Карпатія“ Пряшів – Мукачево II. 3:1 (3:1).

Таблічка: 1. ФК „Руснак“ Руськый Керестур
2. ФК Мукачево I
3. ФК „Карпатія“ Пряшів
4. ФК Мукачево II

-ш-



• Фотболовый клуб „Карпатія Пряшів“ зо своїм тренером Федором Віцом (зліва) і ведучім мужства Петром Крайняком, мол. (справа), котры на турнаю в Мукачеві здобыли третє місце. Бранкарь пряшівского мужства ся став найліпшым бранкарєм цілого турнаю.

